

**ЗАСГИЙН ГАЗРЫН ҮЙЛ АЖИЛЛАГААНЫ
2005 ОНЫ IV САРЫН ТОВЧ МЭДЭЭЛЭЛ**

/2005.03.26-2005.04.25./

САНХҮҮ, ЭДИЙН ЗАСАГ

Монгол Улсын төсвийн хүрээний 2006-2008 оны дунд хугацааны макро эдийн засгийн төлөв байдал, хандлагыг тодорхойлов. Олон улсын банк, санхүүгийн байгууллагын ангиллаар Монгол Улс бага орлоготой улсуудын эгнээнд багтаж байна. Монгол Улсын ДНБ-ий хэмжээ 2004 оны байдлаар 1.6 тэрбум ам.доллар байгаа бөгөөд нэг хүнд ногдох ДНБ-ий хэмжээ 600 орчим ам.доллартай тэнцэж байна. Эдийн засгийн өсөлт 2003 онд 5.6 хувь, 2004 онд 10.6 хувьд хүрч, сүүлийн 5 жилийн дунджаар эдийн засгийн бодит өсөлт 4.4 хувьтай гарч байна. Төсвийн хүрээний гол үзүүлэлт болох эдийн засгийн өсөлтийг 2006-2008 онд 4.3-10.0 хувь байхаар, хэрэглээний бараа, үйлчилгээний үнийн өсөлтийг жилд 5.0 хувиас хэтрүүлэхгүй байхаар тооцлоо.

Монгол Улсын 2006 оны төсвийн хүрээний мэдэгдлийн төсөл, 2007-2008 оны төсвийн төсөөллийг Засгийн газрын хуралдаанаар хэлэлцэж, УИХ-д өргөн мэдүүлэхээр тогтсон байна. Төсвийн хүрээний мэдэгдлийн төслөөр улсын нэгдсэн төсвийн тэнцлийн нийт алдагдлыг 2006 онд ДНБ-ний 4.2, 2007-2008 онд 3.8-2.8 хувь болгож бууруулахаар тооцсон. Төсвийн хүрээний 2006 оны мэдэгдлийн төслөөр орон нутагт олгох санхүүгийн дэмжлэгийг 4.4 тэрбум төгрөг болгож, 2005 оны түвшингээс 1.6 тэрбум төгрөгөөр бууруулахаар, орон нутгаас татан төвлөрүүлэх орлогыг 28.3 тэрбум төгрөгт хүргэж, 2005 оны түвшингээс 4.4 тэрбум төгрөгөөр нэмэгдүүлэхээр тооцов. 2006 онд дотоодын нэмэгдсэн өртгийн албан татварын 20 хувийг хүн амын тоонд үндэслэн орон нутагт буцаан хуваарилахаар тооцож, улсын төсвийн 2006 оны хөрөнгө оруулалтыг 75.4 тэрбум төгрөгөөр тогтоох саналыг тусгав.

Монгол Улсын Засгийн газар, ХБНГУ-ын Засгийн газар хоорондын Санхүүгийн хамтын ажиллагааны ээлжит хэлэлцээр байгуулах асуудлыг УИХ-ын холбогдох байнгын хороодын хуралдаанаар хэлэлцүүлж, хэлэлцээр байгуулахыг дэмжсэн шийдвэр гаргасан байна.

Монгол Улсын Засгийн газар, ХБНГУ-ын Сэргээн босголтын банк хооронд байгуулах “Орон нутгийн зам сайжруулах” төслийн зээлийн гэрээг зарчмын хувьд дэмжиж, УИХ-ын холбогдох Байнгын хороотой зөвшилцөн шийдвэр гарсны дараа гэрээнд гарын үсэг зурах бүрэн эрх олгох тухай Монгол Улсын Ерөнхий сайдын захирамжийг ажлын журмаар гаргахаар тогтсон.

Монгол Улсын Засгийн газар, Швейцарийн Холбооны Улсын Засгийн газар хоорондын Хүмүүнлэгийн тусламж болон техникийн хамтын ажиллагааны хэлэлцээрийн тухай Засгийн газрын хуралдаанаар хэлэлцээд төслийг зүйтэй гэж үзэж, УИХ-ын холбогдох Байнгын хороотой зөвшилцөж шийдвэр гарсны дараа энэхүү хэлэлцээрт Гадаад хэргийн сайд гарын үсэг зурахаар тогтсон байна.

Монгол Улсын Засгийн газар, Дэлхийн банкны Олон улсын хөгжлийн нийгэмлэгийн хооронд байгуулах “Малын индексжүүлсэн даатгалын төсөл”-ийн зээлийн хэлэлцээрийн төслийн тухай Засгийн газрын хуралдаанаар хэлэлцээд холбогдох талтай хэлэлцээ хийхийг Сангийн сайдад зөвшөөрлөө.

Азийн хөгжлийн банкны хөнгөлөлттэй зээлээр хэрэгжүүлэх “Бүс нутгийн авто замыг хөгжүүлэх төсөл”-ийн зээлийн гэрээг Засгийн газрын хуралдаанаар хэлэлцэж, соёрхон батлуулахаар УИХ-д өргөн мэдүүлэв. Энэ гэрээний дагуу одоо барьж эхэлсэн Налайх-Чойрын чиглэлийн 200 км замыг үргэлжлүүлэн Замын-Үүд хүртэл 454 км авто замыг барихад АХБ, БНСУ, БНХАУ-ын Засгийн газар хамтарч ажиллахаар тохиролцсон. Замын-Үүд хүртэл засмал замыг барихад 78 сая гаруй ам.доллар шаардлагатай бөгөөд үүний 37,1 сая долларын санхүүжилтийн эх үүсвэрийг АХБ хөнгөлөлттэй зээлээр олгох болжээ. БНСУ-ын Засгийн газраас олгох 23,9 сая доллартай тэнцэх хөнгөлөлттэй зээл, БНХАУ-ын Засгийн газрын буцалтгүй тусламжаар

олгох 1,5 сая ам.доллар, Монгол Улсын Засгийн газрын гаргах 15,6 сая ам.долларын санхүүжилтээр урд хил хүртэлх хатуу хучилттай зам барихаар тооцов.

Монгол Улсын нэгдсэн төсвийн 2005 оны 3 дугаар сарын гүйцэтгэлээр улсын нэгдсэн төсвийн нийт орлого 152.1 тэрбум төгрөгт хүрч, орлогын төлөвлөгөө 12.3 тэрбум төгрөгөөр буюу 8.8 хувиар давж, өнгөрсөн оны мөн үеийнхээс 14.7 тэрбум төгрөгөөр буюу 10.7 хувиар өсчээ. Улсын нэгдсэн төсвийн зарлага 161.9 тэрбум төгрөг болж, төлөвлөгдсөн нийт зарлагын 82.6 хувийг санхүүжүүлсэн бөгөөд өнгөрсөн оны мөн үеийнхээс 29.1 тэрбум төгрөгөөр буюу 21.9 хувиар өссөн байна. Орон нутгийн төсвийн I улирлын нэгдсэн дүнгээр төсвийн орлогын төлөвлөгөө 3.5 хувиар давж, төлөвлөгдсөн зарлагын 78.8 хувийг санхүүжүүлжээ. Улсын нэгдсэн төсвийн урсгал тэнцэл **19.8** тэрбум төгрөгийн ашигтай, нийт тэнцэл **9.7** тэрбум төгрөгийн алдагдалтай гарсан байна.

Улсын төсвөөс 1110 төсөвт байгууллагад 2005 оны 4 дүгээр сард **36.5** тэрбум төгрөгийн зарлага санхүүжилт хийснээс олон хүүхэдтэйн тэтгэмжид 975.0 сая төгрөг, халамжийн тэтгэвэрт 1.7 тэрбум төгрөг, тэтгэврийн нөхөн олговорт 98.5 сая төгрөг, тэтгэврийн даатгалын санд 4.0 тэрбум төгрөг, төрөөс хариуцах эрүүл мэндийн даатгалын хураамжид 404.5 сая төгрөг Засгийн газрын нөөц хөрөнгөөс 323.7 сая төгрөг, хуваарилагдаагүй зардлаас 48.1 сая төгрөгийн санхүүжилт тус тус олгосон байна. Орон нутгийн төсөвт олгох эхний 4 сарын НӨАТ-ын тооцоог хийж, нийтдээ 3.69 тэрбум төгрөгийн НӨАТ-ын буцаан олголтыг орон нутагт шилжүүллээ.

Засгийн газар энэ сард (өссөн дүнгээр) гадаад зээлийн үндсэн төлбөрт 6.1 тэрбум төгрөг, хүүгийн төлбөрт 5.7 тэрбум төгрөг, нийт **11.8** тэрбум төгрөг төлсөн байна. Засгийн газрын бондын үндсэн төлбөрт 19.0 тэрбум төгрөг, хүүгийн төлбөрт 171.6 сая төгрөг, бүгд **19.2** тэрбум төгрөг төлжээ.

Арилжааны банкуудаас дамжуулан зээлдүүлэх гэрээний дагуу 4 дүгээр сарын байдлаар (өссөн дүнгээр) зээлийн үндсэн төлбөрт 3.7 тэрбум, хүүгийн төлбөрт 3.3 тэрбум, бүгд **7.0** тэрбум төгрөгийг улсын төсөвт төвлөрүүлэв. Төрийн сангийн төгрөгийн болон гадаад валютын чөлөөт эх үүсвэрээс 2005 оны эхний 4 сарын байдлаар шөнийн (овернайт) зээл олгож, Монголбанк болон арилжааны банкуудад богино хугацаат мөнгөн хадгаламжийг байршуулж, нийт төрийн санд **136.7** сая төгрөгийн хүүгийн орлогыг төвлөрүүлсэн байна.

Худалдан авах ажиллагааны вэб боловсруулах зөвлөх компанитай байгуулсан гэрээний хэрэгжилтэд хяналт тавьж, тэднийг мэргэжил, аргазүйн зөвлөгөөгөөр хангаж ажиллан, <http://www.e-procurement.mn> гэсэн хаяг бүхий Засгийн газрын худалдан авах ажиллагааны вэб хуудсыг туршилтын журмаар ажиллуулж байна.

ҮЙЛДВЭР, ХУДАЛДАА

Жижиг, дунд үйлдвэр /ЖДҮ/-ийг дэмжих хөтөлбөрийг Засгийн газрын хуралдаанаар хэлэлцэн баталлаа.

Аж үйлдвэрийн хөгжлийн стратеги баримт бичиг боловсруулах ажил хийгдэж байна.

Чөлөөт худалдааны гэрээ байгуулах Road Map боловсруулах ажлын чиглэлээр худалдааны гол түнш орнуудаар бараа болон үйлчилгээний тарифын судалгаа хийж, чөлөөт худалдааны хэлэлцээр байгуулснаар манай орны эдийн засагт үзүүлэх нөлөөлөл, үр ашгийг тооцоолж байна.

ЖДҮ эрхлэгчид, бизнес эрхлэгчдийн үйл ажиллагаанд хүндрэл, бэрхшээл учруулж буй хууль тогтоомжийн судалгаа гаргаж, нэмэлт, өөрчлөлт оруулах санал боловсруулав. 2004-2006 онд хэрэгжүүлэх ЖДҮ-ийг дэмжих төслийн гэрээнд гарын үсэг зурлаа.

Үйлдвэр, худалдааны сайдын дэргэдэх Мэргэжлийн холбоодын нэгдсэн зөвлөлийн хуралдааныг зохион байгуулав.

“ШУ-Үйлдвэрлэлийн хамтын ажиллагаа” уулзалт, семинарыг зохион байгуулав.

“Монгол ноолуур” эрдэм шинжилгээний бага хурал зохион байгуулж, “Ноолуур” хөтөлбөрийн хэрэгжилт, үр дүнгийн талаар мэдээлэл хийлээ.

ОХУ-тай худалдааг либералчлах асуудлаарх ажлын хэсгийн V хуралдаан, тус улсын ДХБ-д элсэхээр хийж буй олон болон хоёр талын хэлэлцээнд тус тус оролцов.

ОХУ-тай хийсэн хил, бүс орчмын хамтын ажиллагааны асуудлаарх Дэд хорооны хурлын дүн, мөн улстай хийх либералчлал, ДХБ-ын хүрээний хэлэлцээнд баримтлах чиглэлийг Засгийн газрын хуралдаанаар хэлэлцүүлэв.

Замын-Үүд эдийн засгийн чөлөөт бүсийн шавыг тавилаа.

Тогтвортой байдлын гэрээ байгуулан ажиллаж буй аж ахуйн нэгжүүдийн татварын хөнгөлөлт, чөлөөлөлтийн судалгаа гаргав.

“Гар аргаар ашигт малтмал олборлох тухай” хуулийн төсөл, хууль бусаар ашигт малтмал олборлож буй үйл ажиллагааны талаар хэлэлцүүлэг хийлээ.

Дэлхийн банкны Монгол дахь суурин төлөөлөгчийн газраас зохион байгуулсан “Монгол Улсын уул уурхайн салбар” сэдэвт зөвлөгөөнд мэдээлэл хийж, “Гар аргаар ашигт малтмал олборлох тухай”, “Газрын тосны бүтээгдэхүүний тухай” хуулиудын төслийн талаар санал солилцов.

Монгол-Хятадын Эрдэс баялгийн салбарт хамтран ажиллах Засгийн газрын дэд комиссын хурлыг зохион байгуулав.

БОЛОВСРОЛ, СОЁЛ, ШИНЖЛЭХ УХААН

Боловсролын талаар:

“Бага насны хүүхдийн хөгжлийг дэмжих цогц бодлого” баримт бичгийг баталлаа. Энэхүү цогц бодлого нь бага насны хүүхдийн нийгмийн үйлчилгээг эх хүүхдийн эрүүл мэнд, хоол тэжээл, асаргаа, нийгмийн халамж хамгаалал, боловсрол гэсэн харилцан уялдаа бүхий цогц асуудлын хүрээнд хэрэгцээ, эрэлт, түүний хангалт нийлүүлэлтийг оновчтой хангах нөхцөлийг бүрдүүлэх замаар хүний болон нийгэм, эдийн засгийн хөгжлийн ирээдүйн өсөлтийг дэмжихэд чиглэгдсэн бүх талын хөрөнгө оруулалтыг үр дүнтэйгээр нэмэгдүүлэхэд хувь нэмрээ оруулах болно.

Суурь болон бүрэн дунд боловсрол эзэмшигчдээс авах шалгалтын тоог энэ хичээлийн жилд 3 байхаар шийдвэрлэж, төгсөлтийн шалгалтад бэлтгэгчдэд зориулсан 100 асуулт, даалгавар бүхий 13 багц материалыг боловсрууллаа.

“Сурах бичиг зохиох, хэвлэх, түгээх журам”-ыг “Бүгдээрээ хэлэлцвэл буруугүй” нээлттэй хэлэлцүүлгээр хэлэлцэн оролцогчдын саналд үндэслэн журмыг батлав.

НҮБ-ын Хүүхдийн сангийн санхүүжилтээр хийгдсэн “Бага боловсролын сурлагын амжилтын судалгаа” төслийн урьдчилсан тайланг гаргалаа. Бангкок хотноо болсон “Ази болон Номхон далайн бүсийн орнуудын бага боловсролын сурлагын амжилтын хяналт-шинжилгээний судалгааны төслийн техникийн II хуралдаанд монголын судалгааны тайланг хэлэлцүүлж, бүс нутгийн хэмжээнд хамгийн сайн хийсэн орноор шалгарлаа.

ЮНЕСКО-гийн санхүүжилтээр Хүний эрхийн үндэсний комисстой хамтран Ерөнхий боловсролын сургуульд зааж буй Хүний эрхийн боловсрол олгох сургалтын өнөөгийн байдлыг тодорхойлох Үндэсний судалгааны бэлтгэлийг хангаж, судалгааг орон даяар зохион байгуулж байна.

2005-2006 оны хичээлийн жилээс хоёр улсын Засгийн газар хоорондын хэлэлцээрийн дагуу БНХАУ-ын их, дээд сургуульд 50 оюутан, 50 мэргэжил дээшлүүлэгчид, БНЧУ-ын Засгийн газрын тэтгэлгээр Чех улсад 4 хүн докторантурт суралцах болов. ОХУ, Украин, Казахстан улсын их, дээд сургуульд хоёр улсын Засгийн газар хоорондын хэлэлцээрийн дагуу 2005-2006 оны хичээлийн жилээс суралцах оюутан, магистрант, докторант нарын уралдаант шалгалтыг хэвлэл, мэдээллийн хэрэгслээр зарлаж, шалгалтыг 3 үе шаттайгаар зохион байгуулав.

Япон Улсын Засгийн газрын буцалтгүй тусламжийн хүрээнд хэрэгжиж буй “Хүний нөөцийг хөгжүүлэх тэтгэлэг” төслийн хүрээнд 2005-2006 оны хичээлийн жилээс тус улсын их, дээд сургуулийн магистрантурт 20 хүн суралцахаар гэрээ байгуулав.

“Дэвшилтэт технологитой үйлдвэрлэл ба өндөр зэрэглэлийн мэргэжлийн сургалт” сэдэвт семинар-ярилцлагыг зохион байгуулав. Энэ семинар-ярилцлагын үр

дүнд мэргэжлийн боловсрол, сургалтын чиглэлээр Япон Улсад тавих төслийн чиглэл тодорхойлогдох боломж бүрдэж байгаагаараа ач холбогдолтой юм.

Оршин суугаа газраасаа 500 км ба түүнээс дээш километр хол сургуульд суралцагч оюутныг өвлийн амралтаар орон нутагтаа зорчих нэг талын зардлыг төрөөс хариуцан олгодог болсны дагуу Улаанбаатар хотоос алслагдсан байдал /550 км /-аар болон Орхон, Архангай, Ховд аймагт сургалтын үйл ажиллагаа эрхэлж байгаа их сургууль, дээд сургууль, коллежид оршин суудаг газраасаа өөр аймгаас элсэн суралцаж байгаа оюутанд өвлийн амралтаараа ирэх, буцах зардлын нэг талыг төрөөс хариуцах төсвийн тооцоог хийж зарим сургуулиудын санхүүжилтийг олгож эхэллээ.

Үндэсний номын санд 9.9 сая төгрөгийн өртөг бүхий уншигчийн ширээ, сандал, Ховд аймгийн Чандмань сумын соёлын төвд 835 мянган төгрөгийн үндэсний хөгжим худалдан авч нийлүүлэх гэрээг тус тус байгуулав.

Соёл, урлагийн талаар:

БНХАУ-д “Монголын соёлын өдрүүд”-ийг зохион байгуулав. Анх удаа зохион байгуулж буй манай соёлын өдрүүд нь Монголын ард түмний соёлын өв уртын дуу, хөөмий, морин хуур, уран нугаралт, ардын биелгээ болон сонгодог дуурь, бүжгийн жүжгийн дээжсийг Хятадын ард түмэнд танилцуулан, өнөөгийн Монгол орны соёл, урлагийн хөгжлийн шинэ хандлага, уран сайхны сэтгэлгээний олон талт хэв маягийг харуулсан орчин үеийн дүрслэх урлагийн шилдэг бүтээлүүдийг болон монголын ард түмний амьдрал, зан заншил, үзэсгэлэнт байгаль, монгол орны бүтээн байгуулалт, хөгжил цэцэглэлт зэргийг гэрэл зургийн үзэсгэлэнг дэлгэн үзүүлээ.

Япон Улсад зохиогддог Ази, Номхон далайн орнуудын олон улсын бүжгийн жүжигчдийн уралдаан, БНХАУ-ын Учао хотод зохиогдсон Олон улсын циркчдийн наадамд амжилттай оролцсон 4 жүжигчинд 11.5 сая төгрөгийн мөнгөн шагнал олгох тухай асуудлыг шийдвэрлэв.

“Түүх, соёлын дурсгалт зүйлд зэрэглэл, үнэлгээг тодорхойлох мэргэжлийн зөвлөлийн бүрэлдэхүүн”-ийг шинэчлэн, хурлыг зохион байгуулж, Дүрслэх урлагийн музей, Богд хааны ордон музей, Эрдэнэ зуу музейд хадгалагдаж байгаа 38 танка буюу бурхны шүтээн зураг, Төвхөн хийдэд хадгалагдаж буй Өндөр гэгээн Занабазарын бүтээсэн өөрийнх нь Лагшин дүр зэргийг газар дээр нь үзэж хэмжин тодорхойлолтыг гарган “Түүх, соёлын хосгүй үнэт дурсгалт зүйл”-ээр тодорхойлов.

Шинжлэх ухаан, технологийн талаар:

“Монгол Улсын үндэсний хөгжлийн хөтөлбөр 2021”-ийн төслийг эцэслэн боловсрууллаа.

Хангайн, Төвийн бүсийн хөгжлийн хөтөлбөрийг бүс нутгийн аймгийн төлөөлөл, эрдэмтдийн оролцоотойгоор хэлэлцэх бүсийн зөвлөгөөнийг тус тус зохион байгуулав.

Шинжлэх ухаан, технологийн сангийн нөөц хөрөнгөөс эргэж төлөгдөх нөхцөлтэйгээр 2005 онд санхүүжүүлэх шинжлэх ухаан, технологийн зэхэц болон бизнесийн байгууллагатай хамтран нэвтрүүлэх ажлыг сонгон шалгаруулах комисс байгуулан ажлыг нь эхлүүлэв.

Монгол Улсын БСШУ-ы сайд П.Цагаан тэргүүтэй төлөөлөгчид БНХАУ-д албан ёсны айлчлал хийв. Айлчлалын үеэр Монголын соёлын өдрийн нээлтэд оролцож, БНХАУ-ын Боловсролын яам, Соёлын яамны сайд, ШУТ-ийн яамны дэд сайдтай уулзаж, хоёр орны боловсрол, соёл, шинжлэх ухааны харилцаа, хамтын ажиллагааны өнөөгийн байдал, цаашдын үйл ажиллагааны талаар санал солилцсон нь хоёр орны салбарын хамтын ажиллагааны хөгжилд чухал хувь нэмэр оруулав.

ЭРҮҮЛ МЭНД

Хүн амын эрүүл мэндийг хамгаалах талаар

“Эрүүл мэндийн салбарын мастер төлөвлөгөө”-г хэрэгжүүлэх ажлыг зохион байгуулан түүнд шаардагдах хөрөнгийг жил бүрийн эдийн засаг, нийгмийг хөгжүүлэх үндсэн чиглэл, нэгдсэн төсөвт тусгаж, гадаад дотоодын болон хувийн хэвшлийн байгууллагын хөрөнгө оруулалтыг татан оролцуулах талаар холбогдох арга хэмжээ авч ажиллахаар болов.

Олимпийн наадамд бэлтгэх үндэсний хороо, бүрэлдэхүүнийг шинэчлэн байгуулав. “Спортод сэргээшийн эсрэг Копенгагений Тунхаглал”-д Монгол Улс нэгдэн орохоор боллоо.

Эмэгтэйчүүдийн болон бэлгийн замаар дамжин халдварлах өвчнийг эмчлэхэд зориулсан нэн шаардлагатай 18 нэрийн 47.0 сая төгрөгийн эм, тариаг аймаг, хотод хуваарилан олгов.

Эрүүл мэндийн байгууллагуудын төлбөрт үйлчилгээтэй холбогдон гарч буй иргэдийн гомдол, чирэгдлийг багасгах, хүн амын эрэлт хэрэгцээнд нийцүүлэн тусламж үйлчилгээний чанар, үр ашгийг сайжруулах зорилгоор “Төлбөртэй үйлчилгээг зохицуулах тухай журмын төсөл” боловсруулж байна.

Монгол Улсын Ерөнхийлөгчид нэр дэвшигчдэд эмнэлгийн дүгнэлт гаргах комиссыг Улсын клиникийн II эмнэлгийг түшиглүүлэн 11 хүний бүрэлдэхүүнтэйгээр томилон ажиллуулж байна.

Эмийн эмчилгээг зохицуулах хороог шинэчлэн байгуулав.

Төрөлхийн гаж болон хөгжлийн тохиолдлыг бүртгэн холбогдох судалгаа дүгнэлт хийж ажиллахаар боллоо.

“Эх, хүүхдийг бичил тэжээлийн дутлаас сэргийлэх стратеги”-ийг баталж, энэхүү стратегийг хэрэгжүүлэх төлөвлөгөөг жил бүр батлуулж, хэрэгжүүлэх ажлыг орон нутагт зохион байгуулж, мэргэжил аргагүйн дэмжлэг үзүүлж байх, стратегийн хэрэгжилтийн явц, үр дүнг жил бүрийн IV улиралд Эрүүл мэндийн сайдын зөвлөлийн хуралд хэлэлцүүлж байхаар боллоо.

Халдварт өвчнөөс урьдчилан сэргийлэх талаар:

Манай улсад бэлгийн замаар дамжих халдвар дорвитой буурахгүй байгаа бөгөөд сүүлийн сар гаруй хугацаанд хүний дархлал хомсдлын вирусын халдварын 4 тохиолдол шинээр илэрсэнтэй холбогдуулан Монгол Улсын Ерөнхий сайдаар ахлуулсан Нийгмийн эрүүл мэндийн үндэсний зөвлөл хуралдлаа. ХДХВ/ДОХ-оос сэргийлэх үйл ажиллагаанд нийгмийн бүхий л салбарын оролцоог нэмэгдүүлэх талаар тус зөвлөлийн даргын албан даалгавар гаргахаар шийдвэрлэлээ. Уг албан даалгаварт ХДХВ/ДОХ/БЗДХ-ыг илрүүлэх лабораторийн оношлогооны чадавхийг сайжруулах, Садар самуун явдалтай тэмцэх тухай хуульд нэмэлт, өөрчлөлт оруулах, 100 хувь бэлгэвч хэрэглэх хөтөлбөрийг өргөжүүлэн үндэсний түвшинд хэрэгжүүлэх, оюутан сурагчдад зориулсан ХДХВ/ДОХ/БЗДХ-ын талаарх хичээлийн чанарыг сайжруулах, нийт хүн амд зориулсан ХДХВ/ДОХ/БЗДХ-аас сэргийлэх талаарх МСС-г эрчимжүүлэх зэрэг асуудлуудыг тусгахаар боллоо.

Зарим аймаг, хотуудад БЗДХ ихэссэнтэй холбоотойгоор ЭМЯ, Глобаль сангийн төслийг зохицуулах нэгж, Халдварт өвчин судлалын үндэсний төв, НҮБ-ын Хүн амын сан, ДОХ-той тэмцэх үндэсний сан зэрэг байгууллагууд хамтран ажлын хэсэг байгууллаа.

100 хувь бэлгэвч хэрэглэх хөтөлбөрийг Улаанбаатар хотод хэрэгжүүлж эхлэх гэж байна.

2005 оны 4 дүгээр сарын 1-ний байдлаар Монголэмимпекс компанийн агуулахад 220 нэрийн 1422.4 сая төгрөгийн, орон нутгийн эм хангамжийн компаниудад 86-202 нэрийн 561.3 сая төгрөгийн Үндэсний зайлшгүй шаардлагатай эмийн үлдэгдэлтэй байна. ҮЗШЭ-ийн хангамж Улаанбаатар хотод 78.0%, орон нутагт 65-82%-тай байна.

2005 оны эхний 3 сард 10617 эх амаржиж, 10596 амьд хүүхэд төрсөн байна. Энэ хугацаанд 14 эх эндсэн нь өнгөрсөн оны мөн үеийнхээс 1-ээр нэмэгдэж, сүүлийн 5

жилийн дунджийн хэмжээнд байна. Нэг хүртэлх насны 287 хүүхэд эндсэн нь өнгөрсөн оны мөн үеийнхээс 13-аар их, сүүлийн 5 жилийн дунджаас 23 тохиолдлоор буурч, 1-5 хүртэлх насны 67 хүүхэд эндсэн нь өнгөрсөн оны мөн үеийнхээс 2 тохиолдлоор, сүүлийн 5 жилийн дунджаас 24-өөр буурсан байна.

Оны эхний 3 сард халдварт өвчний 6888 тохиолдол бүртгэгдсэн нь өнгөрсөн оны мөн үеийнхээс 2450-аар, сүүлийн 5 жилийн дунджаас 3414-өөр буурч 10000 хүн амд халдварт өвчний 27.4 тохиолдол ногдох боллоо.

НИЙГМИЙН ХАМГААЛАЛ, ХӨДӨЛМӨР

Нийгмийн хамгааллын бодлого, зохицуулалтын талаар:

“Нийгмийн халамжийн тэтгэврийг нэмэгдүүлэх тухай” Засгийн газрын тогтоолын төсөл боловсруулаад байна. Нийгмийн халамжийн тэтгэврийг 2005 оны 7 дугаар сарын 1-нээс эхлэн 7.5 хувиар нэмэгдүүлэх арга хэмжээнд 42.3 мянган хүн хамрагдаж, 273,0 сая төгрөг нэмж зарцуулах тооцоо гарч байна.

“Амьжиргаанд туслах халамжийн туршилтын хөтөлбөр”-ийг туршин, сум, хороодод “Амьжиргааг дэмжих зөвлөл” байгуулан, гарааны судалгааны тайланг нэгтгэж, цаашид тэтгэвэр, тэтгэмжийн шинэчлэлд болон хамт олонд түшиглэсэн амьжиргааг дэмжих нөхцөлт үйлчилгээнд хамрагдах иргэдийн хүрээг тодорхойлоод байна.

Төрийн зарим чиг үүргийг төрийн бус байгууллагаар гүйцэтгүүлэх зорилгоор Монголын хэрэглэгчдийн эрх ашгийг хамгаалах нийгэмлэгүүдийн Үндэсний холбоотой 2005 онд хамтран ажиллах гэрээг байгуулав.

Эрүүл мэндийн салбарын шинэчлэлд дэмжлэг үзүүлэх техник туслалцааны төслийн багтай хамтран “Эрүүл мэндийн санхүүжилтийн бодлогын хувилбарууд” сэдэвт уулзалтыг зохион байгуулав. Уулзалтанд эрүүл мэндийн даатгалын асуудал хариуцсан ажилтнууд оролцож, нэгдсэн ойлголтонд хүрснээрээ чухал ач холбогдолтой болов.

Хүн амын хөгжлийн бодлого, зохицуулалтын талаар:

Хүн амын хөгжлийн асуудлаарх үндэсний хороог шинэчлэн байгууллаа. Хороо нь Гэр бүлийн хөгжил, Хүүхэд, өсвөр үе, залуучуудын хөгжил, Ахмад настан, насжилт болон Хөгжлийн бэрхшээлтэй иргэдийн асуудлаарх салбар хороод, тэлгээрийн үйл ажиллагааг зохицуулах чиг үүрэг бүхий Удирдах зөвлөл, шаардлагатай мэдээлэл, судалгаагаар хангах, мэргэжлийн зөвлөгөө өгөх, дэмжлэг үзүүлэх зорилготой Шинжээчдийн бүлэгтэйгээр зохион байгуулагдлаа. Мөн нийслэл, аймгуудад орон нутгийн салбар зөвлөлийг байгуулан ажиллуулах юм.

“Монгол иргэдийн гадаадад хөдөлмөр эрхлэлтийн байдал, үр дагавар” сэдэвт судалгаа хийлээ. Судалгаанд АНУ, Солонгос, Чех улсуудад ажиллаж байгаа 700 гаруй иргэд, гэр бүлийн гишүүдийн хэн нэг нь гадаадад ажиллаж байгаад ирсэн 216 өрх, 184 иргэнийг хамруулсан байна. Судалгаагаар гадаад орнуудад ажиллаж байгаа монгол иргэдийн хөдөлмөрийн нөхцөл, тулгамдаж буй асуудал, гэр орондоо үзүүлж буй дэмжлэгийн талаар судалж, дүгнэлт гаргаснаараа шинэлэг боллоо.

Орон нутагт тэнэмэл амьдралтай иргэдийг бүртгэх, судалгаа авах аргачилсан зөвлөмж, асуулгын маягт боловсруулж, орон нутгуудад хүргүүлэв.

Хөдөлмөрийн зах зээлийн бодлого, зохицуулалтын талаар:

“Хөдөлмөрийн аюулгүй ажиллагаа, эрүүл ахуйн орчныг сайжруулах Үндэсний хөтөлбөр /2005-2010/”-ийг батлав. Хөтөлбөрийн зорилго нь үйлдвэрлэлийн осол, мэргэжлээс шалтгаалсан өвчнийг бууруулах, хөдөлмөрлөх үйл ажиллагааны явцад ажилтны эрүүл мэнд, амь насыг хамгаалах нөхцөлийг бүрдүүлэх, ажилтныг мэргэжлийн

эрсдлээс хамгаалах эрх зүйн болон нийгмийн баталгааны түвшинг нэмэгдүүлэх, нийгмийн түншлэлийн механизмыг хөгжүүлэхэд чиглэгдэх юм.

Бүсийн хөгжлийг дэмжих сан байгуулах, түүнд хөрөнгө төвлөрүүлэх, зарцуулах, хяналт тавих журам батлагдсантай холбогдуулан говийн аймагт ажиллаж байгаа эмч, багш нарт говийн нэмэгдэл олгох асуудлыг судалж байна.

Нийгмийн даатгал, халамжийн сангаас олгох тэтгэвэр, тэтгэмжийн талаар:

2005 оны 3 дугаар сард нийгмийн даатгалын тэтгэвэрт 30,2 тэрбум төгрөг олгохоос 30,2 тэрбум төгрөгийн тэтгэврийг бүрэн олгосон байна. Нийгмийн даатгалын шимтгэлийн орлогод 25,5 тэрбум төгрөг оруулахаас 28,4 тэрбум төгрөг оруулж төлөвлөгөөг 111,2 хувиар биелүүлжээ. Нийгмийн даатгалын тэтгэврийн санхүүжилтэд 29,3 тэрбум, эрүүл мэндийн даатгалын санхүүжилтэд 4,9 тэрбум, тэтгэмжийн даатгалын санхүүжилтэд 1.1 сая, үйлдвэрлэлийн осол, мэргэжлээс шалтгаалах өвчний даатгалын санхүүжилтэд 939,3 сая, ажилгүйдлийн даатгалын санхүүжилтэд 342,1 сая төгрөг, нийгмийн даатгалын санхүүжилтэд нийт 36,6 тэрбум төгрөг зарцуулсан байна.

2005 оны 3 дугаар сард өссөн дүнгээр нийгмийн халамжийн тэтгэврийг 40378 хүнд олгож 1.8 тэрбум төгрөг, нийгмийн халамжийн тэтгэмжийг 390406 хүнд олгож, 5,3 тэрбум төгрөг зарцуулжээ. Нийгмийн халамжийн болон асрамжийн үйлчилгээнд 11726 хүн хамрагдан 53,1 сая төгрөг, тахир дутуу иргэнд үзүүлсэн нийгмийн халамжийн үйлчилгээнд 3300 хүн хамрагдан 163,1 сая төгрөг, ахмад настнуудад үзүүлсэн хөнгөлөлт үйлчилгээнд 24690 хүн хамрагдан 381.2 сая төгрөг зарцуулжээ. Нийгмийн халамжийн үйлчилгээнд нийт 471838 хүн хамрагдаж 7,7 тэрбум төгрөг зарцууллаа.

БАЙГАЛЬ ОРЧИН

Байгаль орчныг хамгаалах тухай хуульд нэмэлт, өөрчлөлт оруулах тухай хуулийн төсөл, “Аюултай хог хаягдлыг ашиглах үйл ажиллагаа эрхлэх зөвшөөрөл олгох журам”, “Аюултай хог хаягдлыг паспортжуулах журам”-ын төслийг боловсруулав.

Засгийн газрын хэрэгжүүлэгч агентлаг - Усны хэрэг эрхлэх газар байгуулан, “Ногоон хэрэм сан”-д хөрөнгө төвлөрүүлэх, зарцуулах журмын төслийг боловсруулав.

“Ойн тухай” хуулийг боловсронгуй болгох, “Иргэдийн оролцоотой ойн нөөцийн менежементийн эрх зүйн асуудлууд”, “Ойн нөөцийн хамтын менежементийн гэрээ эрх зүйн асуудлаарх үндэсний семинар болов.

“Ойн нөөцөд учирсан хохирлын үнэлгээг батлах тухай” БО-ны Сайдын тушаал гарган мөрдөж байна.

Богдхан уулын дархан цаазат газрын халиун бугыг хамгаалах, өсгөж үржүүлэх менежмент төлөвлөгөөг хэрэгжүүлэх, халиун буга сэргээн нутагшуулах ажлын хүрээнд Хустайн нурууны Байгалийн цогцолборт газраас 10 толгой согооны илий барих, тэжээж арчлах туршилт-судалгааны ажлыг ШУА-ийн Биологийн хүрээлэнтэй хамтран зохион байгуулахаар шийдвэрлэв. Мөн халиун буга хамгаалах, өсгөн үржүүлэх талаарх Төв аймгийн Мөнгөнморьт сумын “Эрдэнэ-согоо” хоршооны байгаль орчны мэргэжлийн байгууллагын эрхийг сунгахаар шийдвэрлэв.

Монгол-Америкийн эрдэмтдийн бага хурлыг зохион байгуулсан бөгөөд Эг-Үүрийн сав газрын биологийн төрөл зүйлийн судалгаа, шинжилгээний зориулалтаар Хөвсгөл аймгийн Алаг эрдэнэ, Хатгал, Түнэл, Чандмань-Өндөр, Цагаан-Үүр, Эрдэнэбулган, Булган аймгийн Тэшиг, Хутаг-Өндөр сумдын нутгаас тогтоосон хугацаанд загас барьж радио датчик суулгах, тэмдэг тавьж эргүүлж тавих, загас агнах зөвшөөрөл Байгаль хамгаалах “Монголын тул” санд олгов.

“Аргаль хонийг хамгаалах үндэсний хөтөлбөр”-ийг хэрэгжүүлэх ажлын хүрээнд ШУА-ийн биологийн хүрээлэн, АНУ-ын Денверийн зоологийн сантай хамтран Увс аймгийн Сагил, Бөхмөрөн сумдын нутгаас 2005 оны 4 дүгээр сарын 16-ны өдрөөс 5 дугаар сарын 1-ний өдөр хүртэл хугацаанд багтаан 5 толгой аргаль хонь барьж, радио дохиолол зүүх зөвшөөрөл олгов.

2005 онд Арабын орнуудтай гэрээлэх идлэг шонхорын тооны дээд хязгаарыг тогтоолоо.

Тусгай хамгаалалттай газар нутгийн талаар

Монголын оюутны холбоо, Байгаль орчны сургалт судалгааны “Эко Ази” дээд сургуультай хамтран экологийн чиглэлээр суралцдаг оюутнуудын дунд эрдэм шинжилгээний бага хурал зохион явууллаа. Хуралд оролцогчид байгаль орчны хөгжлийн тулгамдсан асуудлыг шийдвэрлэх, түүнд олон нийтийн оролцоог дээшлүүлэх талаар хэлэлцэн, санал бодлоо солилцов.

Байгаль орчны сайд Гандантэгчилэн, Зүүн хүрээ Дэчинчойнхорлин хийд, Бэтүб зэрэг 10 орчим сүм хийдийн төлөөлөгчдийг хүлээн авч уулзан, Байгаль хамгаалах үйлст хамтран ажиллахаар боллоо.

"Ногоон хэрэм" үндэсний хөтөлбөрийг хэрэгжүүлэх, гадаад орнууд, донор байгууллагуудын тусламж, санхүүгийн дэмжлэг олох зорилгоор Донор байгууллагуудын төлөөллийг Байгаль орчны сайд хүлээн авч "Ногоон хэрэм" үндэсний хөтөлбөрийг танилцууллаа. Түүнчлэн НҮБХХ-ийн газартай хамтран Донор байгууллагуудын зөвлөлдөх уулзалтыг Улаанбаатар, Бээжин хотноо тус тус зохион байгууллаа.

ОХУ-ын Якутын Бүгд Найрамдах Улсын Якутск хотноо болсон Дэлхийн цаа буга хамгаалагчдын холбооны III их хуралд оролцож, гэрийн цаа бугын сүргийн цусыг сэлбэх зорилгоор гаднаас цаа буга авчрах хөрөнгө санхүүгийн асуудлыг Норвегийн Засгийн газарт тавьж шийдвэрлүүлэхээр тохиролцов.

БАРИЛГА, ХОТ БАЙГУУЛАЛТ

Хот байгуулалтын кадастр хөтлөх журмыг боловсруулах ажлын хэсэг болон үндэсний газрын мэдээллийн системийг ажиллуулах, түүнд өөрчлөлт оруулах журмыг батлууллаа.

Монгол Улсын засаг захиргаа, нутаг дэвсгэрийн нэгжийн шинэчилсэн хуваарийн санал, ажлын тайлан, хавсралт зургуудыг Ерөнхийлөгчид өргөн барьж, НҮБ-ын суурин төлөөлөгчийн газарт танилцуулав.

Монгол Улсын иргэнд газар өмчлүүлэх тухай хуулийг дагаж мөрдөх журмын тухай хуульд нэмэлт, өөрчлөлт оруулах тухай хуулийн төслийг эцэслэн боловсрууллаа.

Монгол Улсын бүсийн тулгуур төв хотуудын хөгжлийн ерөнхий төлөвлөгөөгөөр үзэсгэлэн зохион байгуулж, олон нийтэд сурталчлах үйл ажиллагаа явууллаа.

Барилгын үнэ бүрдлийн норм, норматив боловсруулах ажлыг удирдах, зөвлөх орон тооны бус ажлын хэсгийн хурлаар төсвийн томсгосон норм, үнэлгээ боловсруулах, төсвийн нэгжийн үнэлгээ боловсруулах, барилгын талбайн зөөвөр, тээврийн норм боловсруулах техникийн даалгаврын төслийг хэлэлцэж шийдлээ.

Засаг захиргаа, нутаг дэвсгэрийн нэгжийн шинэчилсэн хуваарийн төслийг хөдөө орон нутагт сурталчлах ажлаар 4 групп зохион байгуулж, группийн хүмүүсийг холбогдох мэдээлэл, ажлын нэгдсэн арга зүйгээр хангаж байна. Хөдөө орон нутгийн сурталчилгаанд ашиглах материал, танилцуулга, холбогдох судалгааны материалуудыг нэгтгэлээ.

Дэлхийн банкны Карбоны болон GEF сангийн санхүүжилтээр хэрэгжүүлэх зарим хот суурин газрын дулаан хангамжийг сайжруулах төслийн санал боловсруулах ажлыг зохион байгууллаа.

ЗАМ ТЭЭВЭР, АЯЛАЛ ЖУУЧЛАЛ

“Азийн замын сүлжээний тухай Засгийн газар хоорондын хэлэлцээр”-ийг УИХ-аар соёрхон батлуулав. Германы “Сэргээн босголт” банкны зээл тусламжаар хэрэгжих “Бүс нутгийн авто зам хөгжүүлэх төсөл”-ийг Засгийн газрын хуралдаанаар хэлэлцүүлэн, УИХ-аар соёрхон батлуулахаар өргөн мэдүүлэв.

АХБ-ны Ядуурлыг бууруулах төслийн хүрээнд Авто замын үйлчилгээний цогцолбор барих санамж бичигт гарын үсэг зурав.

Улсын чанартай замын дагуух үйлчилгээний төвийн стандарт боловсруулж батлуулан “Тэнгэрийн тэмдэг” ХХК-тай гэрээ байгуулав.

Дэлхийн банк болон АХБ-ны зээлийн гэрээг шинэчлэх, машин механизм, тоног төхөөрөмжийн ашиглалтын үр бүтээлийг нэмэгдүүлэх үүднээс “Машин механизм, тоног төхөөрөмжийн урт хугацаат зээлийн гэрээг шинэчлэн байгуулах, зарим хөрөнгийг шилжүүлэн хуваарилах тухай” ЗТАЖ-ийн Сайдын тушаал гарган, хэрэгжүүлж байна.

Олон улсын болон улсын чанартай авто замаар зорчих авто тээврийн хэрэгслээс төлбөр авах цэгийн үйл ажиллагааг тогтмолжуулах, төвлөрсөн төлбөрийг захиран зарцуулах ажлыг журамлах зорилгоор авто замын төлбөр хураах цэгүүдийн 2005 оны орлогын төлөвлөгөө, үйл ажиллагааны зардлын хэмжээг батлан мөрдүүлэв.

Монгол Улс ТИР Карнейн хүрээнд барааг Олон улсын хэмжээнд тээвэрлэх тухай Конвенцид нэгдэн орж, авто тээврийн хэрэгслээр гаалийн хөнгөвчилсөн горим бүхий олон улсын тээвэрлэлтийг гүйцэтгэх болж байгаатай холбогдуулан ТИР горимоор гүйцэтгэх тээвэрлэлтийн найдвартай ажиллагааг хангах “Аюулгүйн хуримтлал”-д зориулж хөрөнгө гаргах асуудлыг тавиад байна.

ОХУ-ын Улаан-Үүд хотноо Монгол, Оросын ЗГХК-ын Бүс нутаг, хил орчмын хамтын ажиллагааны дэд комиссын ээлжит V хуралдаанд оролцож, Алтанбулаг-Хиагтын хилийн боомт дээр хоёр тал тээврийн хяналт шалгалтыг байнга явуулж бүрэн бус тээврийн хэрэгслээр тээвэрлэлт гүйцэтгэх явдлыг таслан зогсоох арга хэмжээг авахын зэрэгцээ суудлын автомашинаар зорчигч тээвэрлэхтэй холбогдсон зохицуулалтын механизмыг “Олон улсын авто тээврийн харилцааны тухай” хоёр улсын Засгийн газар хоорондын хэлэлцээрт нэмэлт оруулах замаар тусган хэрэгжүүлэх асуудлыг ОХУ-ын талд тавьж, протоколд тусгалаа.

“Тээврийн хэрэгсэлд техникийн хяналт, оношлогоо хийх тухай” Монгол Улсын Засгийн газрын албан даалгавар гарган, аймаг, нийслэлийн Засаг дарга нарт хүргүүлж автотээврийн хэрэгслийн техникийн хяналтын үзлэг, оношлогоог орон даяар эхлүүлэв.

“Зүүн хойд Азийн олон улсын нэгдсэн тээвэр ба тээвэрлэлтийн оновчтой систем” сэдэвт үндэсний семинар зохион байгуулж, манай улсын тээврийн салбарын өнөөгийн байдал, цаашдын хөгжлийн асуудал, ялангуяа олон улсын тээврийн асуудлыг голчлон ярилцсан бөгөөд үндэсний хэмжээнд авч хэрэгжүүлэх ажлын төлөвлөгөөг гаргалаа.

Монгол орны гадаад сурталчилгааг өргөжүүлэх зорилгоор манай улсын аялал жуулчлалын гол чиглэлийн маршрут, 2005 онд зохиогдох арга хэмжээнүүдийн талаарх мэдээлэл, томоохон тур-оператор, зочид буудал, рестораны хаяг зэргийг багтаасан танилцуулга, лого, CD, зурагт хуудас зэрэг сурталчилгааны материалуудыг хэвлэн гаргаж, гадаад дотоодын сурталчилгаанд ашиглан, шинэ вэб хуудас ажиллуулж байна.

Аялал жуулчлалын мэдээллийн “Гийчин” төвийг байгуулан Төв шуудангийн зааланд ажиллуулж байна.

“ЭКСПО-2005” олон улсын үзэсгэлэн яармагийн үеэр Монгол Улсыг сурталчлах зорилгоор “Монголын аялал жуулчлалын өдөр” арга хэмжээг зохион байгуулсан бөгөөд Монгол Улсын павильоныг 30000 гаруй хүн сонирхсон болно. Арга хэмжээг NHK, Fuji телевиз, өдөр тутмын Майничи, Чюничи, спортын өдөр тутмын хэвлэл болон бусад хэвлэл мэдээллийн хэрэгслээр сурталчилсан болно.

ТҮЛШ, ЭРЧИМ ХҮЧ

“Түлш, эрчим хүчний салбарын удирдах ажилтны зөвлөгөөн”, “Удирдлага, менежмент, үр ашиг” сэдэвт онол практикийн бага хурлыг зохион байгуулж, хурлуудаас цаашид авах арга хэмжээний тухай шийдвэр гаргав.

Засгийн газрын хуралдаанаар “Сэргээгдэх эрчим хүчний үндэсний хөтөлбөр /2005-2020/-ийг УИХ-аар хэлэлцүүлэхээр шийдвэрлэлээ.

Сэлэнгэ, Эг, Орхон гол дээр усан цахилгаан станц барьж байгуулах хөрөнгийн эх үүсвэрийг гадаад, дотоодын хөрөнгө оруулагчдад тавих асуудлаар Засгийн газрын

хуралдааны тэмдэглэл гаргалаа. Мөн Түлш, эрчим хүчний яамны бодлогын хүрээнд “Сэргээгдэх эрчим хүчний үндэсний төв”-ийг байгуулахаар шийдвэрлэлээ.

“Төвлөрсөн дулаан хангамжийн үр ашгийг дээшлүүлэх”, “Нийслэлийн цахилгаан хангамжийн найдвартай ажиллагааг хангах”, “Улаанбаатар хотын цахилгаан хангамжийг сайжруулах зорилгоор 2006 оны улсын төсөвт тусгуулах ажлын тухай танилцуулга”, “Шингэрүүлсэн хийг тээврийн хэрэгсэл, үйлдвэрлэл, үйлчилгээ, ахуйд хэрэглэх техник-эдийн засгийн үндэслэл”, “Говь-Алтай аймгийн Төгрөг сумын төвд нүүрсний хийн цахилгаан станц барих техник-эдийн засгийн үндэслэл”, “Ус шүүрэлттэй холбогдуулсан гидрогеологи, геофизикийн судалгаа хийсэн тайлан зэрэг асуудлуудыг Шинжлэх ухаан, техникийн зөвлөлийн хурлаар хэлэлцэж шийдвэрлэв.

“Нүүрсний хийжүүлэлт бүхий цахилгаан станц барих судалгаа”, “Органик бодисоос шингээгч материал гарган авах боломж” зэрэг шинжлэх ухаан, технологийн 2 төслийн бичиг баримтыг баталлаа.

Автотээврийн хэрэгслийг шингэрүүлсэн шатдаг хийн түлшний нэмэлт төхөөрөмжөөр тоноглох үйлчилгээ, ангилал, ерөнхий шаардлага гэсэн улсын стандартыг боловсруулж, Стандартчилал, хэмжил зүйн үндэсний төвийн Стандартын зөвлөлийн хурлаар оруулж батлуулахаар болов.

Шингэрүүлсэн шатдаг хийн үйлчилгээ эрхлэх тусгай зөвшөөрөл олгох, ангилах, сунгах, хүчингүй болгох журмыг батлан “Шингэрүүлсэн шатдаг хийн өргөн хэрэглээний бараа бүтээгдэхүүний хангамж эрхлэх” тусгай зөвшөөрлийг Номин Электроникс, Хөндөстөр ХХК –иудад олголоо.

Дэлхийн банкны хөнгөлөлттэй зээлийн хөрөнгөөр хэрэгжиж байгаа “Түгээх сүлжээний алдагдал бууруулах” төслийн хэрэгжилтэд хяналт тавьж, шаардлагатай асуудлаар зохицуулалт хийх ажлын хүрээнд Дэлхийн банкнаас ирж ажилласан мэргэжилтнүүдтэй ажиллаж, төслийн ажлын явцад дүн шинжилгээ хийсэн.

Даланзадгадын ДЦС-ын зуухны ажиллагааг сайжруулахад ӨМӨЗО-оос 2 сая юанийн буцалтгүй тусламж олгохоор болоод байна.

Тайширын УЦС, Улиастайн 110кВ-ын ЦДАШ-д хэрэглэгдэх БНХАУ-ын Баодингийн тулгуурын үйлдвэрт үйлдвэрлэсэн СК маркийн тулгуурын техникийн үзүүлэлтийг хангахуйц тулгуурт туршилт хийв.

Улаанбаатар хотын агаарын бохирдлыг багасгах хүрээнд БНХАУ-ын хөрөнгө оруулалттай шахмал түлшний үйлдвэр барих, хөнгөн хийг халаалтын зууханд хэрэглэх боломжийн талаар тохиролцоонд хүрч харилцан ойлголцох санамж бичиг үйлдэв.

Өмнөговь аймгийн ДЦС-д хэрэглэх нүүрсийг сонгох, дээж авах, нүүрсний ордуудын талаарх мэдээллийг нэгтгэж, Эрчим хүчний судалгаа, хөгжлийн төвтэй хамтран газар дээр нь ажиллах талаар тохиролцоо.

Багануур-Шивээ овоогийн нүүрсний уурхайг хөгжүүлэх төслийн “Сэлбэг нийлүүлэх гэрээ”-ээр нийлүүлэгдсэн нийт 136 сая иенийн сэлбэгийг НӨАТ болон гаалийн татвараас чөлөөлүүлэв.

Хятад-Монголын Засгийн газар хоорондын IX хуралдааны протоколыг хэрэгжүүлэх арга хэмжээний төлөвлөгөөний дагуу “Шанхай групп” корпорацийн төлөөлөгчидтэй уулзалт зохион байгуулж, нүүрсний хийжүүлэлтийн талаар хамтран ажиллах урьдчилсан тохиролцоонд хүрлээ

Завхан аймгийн эрчим хүчний үйлдвэрийн 2005 оны алдагдлын санхүүжилтийн дутууг нөхөхөд 820.0 сая төгрөг Улсын нөөцийн сангаас гаргахаар шийдвэрлэсэн.

ХҮНС, ХӨДӨӨ АЖ АХУЙ

“Фермерийн аж ахуйн тухай”, “Нэмэгдсэн өртгийн албан татварын тухай хуульд нэмэлт, өөрчлөлт оруулах тухай” хуулиудын төслийг эцэслэн боловсрууллаа.

Эрчимжсэн сүүний аж ахуй эрхлэх иргэн, аж ахуйн нэгжид сүү боловсруулах, савлах тоног төхөөрөмжийг олгох ажлыг зохион байгуулав.

Энэ оны эхний хагас жилд Дундговь, Говьсүмбэр, Төв, Сэлэнгэ аймгийн сумдад үлийн цагаан оготны хаврын тодотгох судалгааны дүнг үндэслэн 100.0 мянган га талбайд энгийн аргаар оготнотой тэмцэхээр шийдвэрлүүлэв.

Мөн энгийн механик аргаар нийт 220.0 мянга га талбайд оготнотой тэмцэх арга хэмжээг зохион байгуулж, хэрэгжүүлэх ажлын гэрээг Ургамал хамгааллын эрдэм шинжилгээний хүрээлэнтэй байгуулав. 2005-2006 онд хэрэглэх ургамал хамгаалах бодисын жагсаалтын төслийг эцэслэн боловсруулж батлуулсан.

“Өрхийн аж ахуйн механикжуулалт – 2005” Олон улсын үзэсгэлэн худалдааг зохион байгуулсан ба гадаад, дотоодын 40 гаруй аж ахуйн нэгж, сургалт эрдэм шинжилгээний байгууллага, 60-аад нэр төрлийн 300 гаруй техник тоног төхөөрөмж тавьж оролцов. Үзэсгэлэнг 8200 гаруй хүн үзэж сонирхсоны зэрэгцээ нийтдээ 13.0 сая төгрөгийн борлуулалт хийгдэж, 1 тэрбум гаруй төгрөгийн техник, тоног төхөөрөмж авах гэрээ хэлцэл хийгдэв.

“Ногоон хувьсгал” хөтөлбөрийн арга хэмжээнд шаардагдах бараа нийлүүлэх тендерт шалгарсан аж ахуйн нэгжүүдтэй гэрээ байгуулав. Түүнчлэн орон нутгаас ирүүлсэн саналыг үндэслэн хөтөлбөрийн хүрээнд олгох тоног төхөөрөмж, үрийн хуваарийг батлуулан, олгох ажлыг зохион байгуулж байна.

БНСУ-ын КОЙКО байгууллагатай говийн болон тал хээрийн бүсийн аймгуудад инженерийн хийцтэй худаг шинээр барьж байгуулах төслийг хэрэгжүүлэх санамж бичигт гарын үсэг зурлаа.

Шувууны томуу өвчний оношлогооны арга зүйн талаар НҮБ-ын ХХАА-н байгууллагын экспертүүдтэй хамтран ажиллаж байна.

Монгол, Болгарын ЗГХК-ын хуралдаанд оролцож, “Монгол Улсын Засгийн газар, БН Болгар Улсын Засгийн газар хооронд Ургамал хамгаалал хорио цээрийн салбарт хамтран ажиллах тухай Хэлэлцээр”, “Монгол Улсын Хүнс, хөдөө аж ахуйн яам, БН Болгар Улсын Хөдөө аж ахуйн яам хооронд хамтран ажиллах тухай Протокол”-ыг байгуулж, гарын үсэг зурлаа.

НҮБ-ын ХХААБ-аас хэрэгжүүлж буй сүүний үйлдвэрлэлийг дэмжих төсөл, ГТХАН-ийн “Хоршооны менежментийг сайжруулах”, “Мал эмнэлгийн хувьчлалыг дэмжих” төсөл, Швейцарийн Хөгжил хамтын ажиллагааны агентлагийн “Бэлчээр-ногоон алт” төслүүдийн Удирдах хорооны бүрэлдэхүүнийг батлуулан, анхны хуралдаануудыг зохион байгуулав.

БАТЛАН ХАМГААЛАХ

“Батлан хамгаалах салбарын нийгмийн хамгааллын бодлого” баримт бичиг, шинээр байгуулах мотобуудлагын мэргэжлийн тусгай батальоны төслүүдийг боловсрууллаа.

Төрийн холбооны газрын шилэн кабелийг ашиглан БХЯ, ЗХЖШ Төрийн холбооны газрын шилэн кабелиар холбогдлоо.

Зэвсэгт хүчний байлдааны болон тусгай үүрэг гүйцэтгэх бэлэн байдлыг дээшлүүлэх талаар авах арга хэмжээг тодорхойлж, ЗХЖШ-ын даргын тушаалаар баталгаажуулж, “Зэвсэгт хүчний анги, байгууллагуудын аюулгүй байдлыг хангах арга хэмжээг сайжруулах тухай” ЗХЖШ-ын даргын албан даалгаврыг боловсруулж, анги, байгууллагуудад хүргүүлэв.

“Терроризмтэй тэмцэх ажиллагааг зохицуулах зөвлөл”-ийн нэгдсэн төлөвлөгөөнд тусгагдсан арга хэмжээг хэрэгжүүлэх талаар холбогдох албан тушаалтнуудыг шаардлагатай мэдээллээр хангаж, “Сөрөг ажиллагааны дүрэм”-ийн төсөлд оруулах санал боловсруулан “Цэргийн цагдаагийн бүлэг” төсөлд дүн шинжилгээ хийж, гадаадын армиудын ижил төстэй байгууллагуудын талаар судалж, бүтэц, орон тооны тооцоог боловсрууллаа.

Зэвсэгт хүчний 123 дугаар ангийн штабтай явуулах КШС-ийг “Мотобуудлагын тусгай хороог байлдааны бэлэн байдлын дээд зэргүүдэд шилжүүлэн уулархаг районд тактикийн жижиг бүлгүүдээр байлдааны ажиллагаа явуулах”, 327 дугаар ангийн

штабтай явуулах тусгай үүргийн КШС-ийг “Үйлдвэрийн осол гарсан үед дэмжлэг үзүүлэх мотобуудлагын тусгай хорооны ажиллагаа”, Баянзүрх дүүргийн Засаг даргын Тамгын газартай явуулах КШС-ийг “Болзошгүй террорист ажиллагааны хор уршгийг арилгах үеийн ЗХЖШ, Баянзүрх дүүргийн Засаг дарга, Засаг даргын Тамгын газрын харилцан ажиллагаа сэдвээр тус тус удирдан явууллаа.

“Иракийн эрх чөлөө” Олон улсын ЭСА-нд оролцож буй цэргийн багийн болон “Афганистаны үндэсний армийг хөгжүүлэх хөтөлбөр”-ийн хүрээнд үүрэг гүйцэтгэж байгаа Сургалтын хөдөлгөөнт багийн IV ээлжийн бүрэлдэхүүн Ирак, Афганистанд үүргээ амжилттай гүйцэтгэж байна.

АНУ-ын Тэнгисийн явган цэргийн албан хаагчид Зэвсэгт хүчний анги, салбаруудаас сонгон авсан 130 хүний бүрэлдэхүүнтэй салбар оролцсон Энхийг сахиулах ажиллагааны “Хааны эрэлд-2005” хээрийн сургалт, дадлагыг Таван толгой дахь Зэвсэгт хүчний сургалтын нэгдсэн төвд амжилттай зохион байгуулж явууллаа.

ЗХЖШ-ын гэмт хэргээс урьдчилан сэргийлэх, “Дэг журам, сахилга хариуцлагыг бэхжүүлэх салбар зөвлөл”-ийн хуралдаанаар “Зэвсэгт хүчний 2005 оны I улирлын цэргийн алба, сахилгын дүн”, “Зэвсэгт хүчний анги, байгууллагуудын офицер, ахлагч нараас цэргийн дүрмээр авсан шалгалтын дүн”, Улаанбаатар цэргийн хүрээний ёс журам сахиулах ангийн цэргийн цагдаагийн бүлэгт “2005 оны I улиралд журамлагдан саатуулагдсан цэргийн албан хаагчдын тухай” асуудлыг авч хэлэлцэн, тодорхой шийдвэр гаргаж, цаашид анхаарч ажиллах ажлын чиглэл, үүрэг өглөө.

ГАДААД БОДЛОГО

Австралийн Парламентийн танхимын дарга Дэвид Хокер тэргүүтэй төлөөлөгчид Монгол Улсад айлчилж, Ерөнхийлөгч, УИХ-ын дарга, Ерөнхий сайд нартай уулзав.

Гадаад хэргийн сайд Ц.Мөнх-Оргил Япон Улсад ажлын айлчлал хийж, энэ үеэр “ЭКСПО-2005” олон улсын үзэсгэлэнгийн нээлтэд Монгол Улсын Засгийн газрыг төлөөлж оролцсон ба Японы улс төр, бизнесийн хүрээнийхэнтэй уулзав. Тэрээр Японы Гадаад хэргийн сайдтай хэлэлцээ хийж, Ерөнхий сайд Ж.Койзумид бараалхаж, холбогдох бусад албаны хүмүүстэй уулзлаа. Хэлэлцээ, уулзалтын үеэр Японы тал Монголд ойрын 5 жилд туслах тусгай хөтөлбөрийг өнгөрсөн оны сүүлчээр баталсан тухайгаа мэдээлэв. Монгол Улсын хүнсний үйлдвэрлэлийг дэмжих зориулалтаар 200 сая иенийн буцалтгүй тусламж үзүүлэхээр шийдвэрлэсэн, ЖДҮ-ийг хөгжүүлэхэд 2 шаттай иенийн зээл олгох асуудлаар хэлэлцээ хийх төлөөлөгчдийг ойрын үед Монголд явуулах гэж буйгаа мэдээлэв.

Сайд Ц.Мөнх-Оргил БНСУ-д албан ёсны айлчлал хийн, БНСУ-ын Гадаад хэрэг, худалдааны сайдтай хэлэлцээ хийж, БНСУ-ын Ерөнхий сайдад бараалхав. Яриа хэлэлцээний үеэр Солонгосын Засгийн газар орголт болон бусад шалтгаанаар монгол ажилчдын нэрсийг хөдөлмөрийн бирж дээр байрлуулахаа өнгөрсөн оны 12 дугаар сараас түр зогсоогоод байсныг Гадаад хэргийн сайдын айлчлалтай холбогдуулан сэргээсэн болохыг мэдэгдэв. БНСУ 2005 онд манай улсаас хоёр орны Засгийн газрын хоорондын тохиролцооны дагуу үйлдвэр, барилга, хөдөө аж ахуйн салбарт нийт 2500 ажилчид авахаар болов. Солонгосын тал 2005 онд Монгол 2.5 сая ам.долларын буцалтгүй тусламж үзүүлэх болсныг мэдэгдэж, цаашид Монгол Улстай уул уурхай, ашигт малтмалын салбарт үр ашигтай хамтран ажиллах сонирхолтой байгаагаа илэрхийлэв. Сайд нар Чойр-Сайншандын хатуу хучилттай зам барихад зориулан БНСУ-ын Засгийн газраас олгож буй 23.9 сая ам.долларын хөнгөлөлттэй зээлийн ерөнхий гэрээнд гарын үсэг зурж, Нийгмийн хамгааллын салбарт хамтран ажиллах тухай Засгийн газар хоорондын хэлэлцээрийг үзэглэв.

Сайд Ц.Мөнх-Оргил Пакистаны Исламабад хотод болсон Азийн хамтын ажиллагааны яриа хэлэлцээний сайд нарын IV уулзалтад оролцов.

ОХУ-ын Эрхүү мужийн захирагч Б.А.Говорин Улаанбаатарт ажлын айлчлалаар ирж, Монгол Улсын Ерөнхийлөгч Н.Багабанди, УИХ-ын дарга Н.Энхбаяр, Ерөнхий сайд Ц.Элбэгдорж нартай уулзалт хийлээ.

БНТУ-ын ГХЯ-ны Дундад Ази, Кавказ, Зүүн Европын газрын дарга Халил Акынжы Монгол Улсад ажлын айлчлал хийж, Монгол Улсын Ерөнхийлөгчид бараалхаж, ГХ-ийн сайд зэрэг холбогдох хүмүүстэй уулзан, хоёр талын харилцаа, хамтын ажиллагааны талаар санал солилцов.

Японы Мицүи компанийн дэд захирал Комий Катуцо Монгол Улсын Ерөнхийлөгч Н.Багабанди, Гадаад хэргийн сайд Ц.Мөнх-Оргилд тус тус бараалхаж, Өмнөговийг хөгжүүлэх төслийн хүрээнд “Айванхо майнз” компанитай хамтран ажиллах болсон тухай мэдээлэв.

Швейцарийн Хуульзүй, цагдаагийн яамны төлөөлөгчид Монгол Улсад зочилж, Хууль зүй, дотоод хэргийн яамны төлөөлөгчидтэй тус улсад хууль бусаар оршин суугаа монгол иргэдийн асуудлаар санал солилцов. Хоёр тал хэлэлцээний дүнгээр санамж бичигт гарын үсэг зурлаа.

Авилгалын эсрэг НҮБ-ын Конвенцид гарын үсэг зурах асуудлыг Засгийн газрын хуралдаанаар хэлэлцэн УИХ-ын холбогдох байнгын хороотой зөвшилцөх нь зүйтэй гэж үзлээ.

“Соёлын биет бус өвийг хамгаалах тухай” НҮБ-ын БСШУБ-ын 2003 оны Конвенцийг соёрхон батлах асуудлыг дэмжлээ.

Сингапур дахь ЕКГ-ыг ЭСЯ болгох тухай асуудлыг шийдвэрлэлээ.

ХУУЛЬ ЗҮЙ, ДОТООД ХЭРЭГ

“Монгол Улсын хууль тогтоомжийг 2008 он хүртэл боловсронгуй болгох Үндсэн чиглэл батлах тухай” УИХ-ын тогтоолын төслийг УИХ-аар хэлэлцүүлж батлуулав.

Санхүүгийн зохицуулах хорооны эрх зүйн байдлын тухай, төрийн албаны тухай хуульд нэмэлт өөрчлөлт оруулах тухай, Шүүхийн шинжилгээний үндэсний төв байгуулах тухай Засгийн газрын тогтоолын төслийг Засгийн газрын хуралдаанаар хэлэлцүүллээ.

Мэдээллийн аюулгүй байдлын тухай, Үндсэн хуулийн цэцийн тухай, Үндсэн хуулийн цэцэд маргаан хянан шийдвэрлэх ажиллагааны тухай, Төрийн болон орон нутгийн өмчийн тухай хуулиудад нэмэлт, өөрчлөлт оруулах тухай хуулийн төсөл, Ашигт малтмалын тухай хуульд нэмэлт, өөрчлөлт оруулах тухай, Ашигт малтмал гар аргаар олборлох тухай хуулийн төслүүдийг Засгийн газрын хуралдаанаар хэлэлцэв.

Аж ахуйн нэгж, байгууллагын орлогын албан татварын тухай, нэмэгдсэн өртгийн албан татварын тухай хуулиудад нэмэлт, өөрчлөлт оруулах тухай хуулийн төсөлд санал өгч, УИХ-д өргөн мэдүүлэх зөвшөөрөл олгов.

Эхийн сүү орлуулагч бүтээгдэхүүний хуулийн төсөлд Засгийн газраас өгөх санал дүгнэлтийг Засгийн газрын хуралдаанаар хэлэлцүүлэв.

Иргэний болон улс төрийн эрхийн олон улсын 1966 оны Пактын хэрэгжилтийн талаар Монгол Улсын ээлжит Үндэсний илтгэлийг бичих, Эрүүдэн шүүх болон бусад хэлбэрээр хэрцгий, хүнлэг бусаар буюу хүний нэр төрийг доромжлон харьцаж шийтгэхийн эсрэг 1984 оны Конвенцийн хэрэгжилтийн талаар Монгол Улсын анхны илтгэл бичих, гэмт хэрэгт холбогдсон насанд хүрээгүй хүмүүсийн эрхийг хамгаалах асуудлаарх ажлын хэсгийн уулзалтыг тус тус зохион байгуулав.

Монгол-Австралийн чадавхийг бэхжүүлэх, жижиг үйл ажиллагааг дэмжих зорилтот хөтөлбөрийн хүрээнд ХЗДХЯ-нд сургалтын тэтгэлэг олгох болон бусад хэлбэрээр чадавхийг бэхжүүлэх үйл ажиллагаа явуулах гэрээнд Төрийн нарийн бичгийн дарга Б.Цэрэндорж, хөтөлбөрийн захирал Рон Стаплес нар гарын үсэг зурав.

Засгийн газрын зарим агентлагуудаас хийж гүйцэтгэсэн ажлын талаар

УЛСЫН МЭРГЭЖЛИЙН ХЯНАЛТЫН ГАЗАР

Улс, аймаг, нийслэлийн Мэргэжлийн хяналтын газар, Хилийн мэргэжлийн хяналтын албадын бүтэц, орон тоог шинэчлэн баталлаа. Энэхүү бүтцийн өөрчлөлт нь

Мэргэжлийн хяналтын байгууллагын орон тоог нягтруулах, ажил үүргийн давхардлыг арилгах чиглэлд хийгдсэн томоохон алхам юм. Мөн төв, орон нутгийн мэргэжлийн хяналтын байгууллагуудын үйл ажиллагаанд хяналт-шинжилгээ, үнэлгээ хийх чиг үүрэг бүхий Дотоод хяналт, мониторингийн газрыг иргэд, олон нийттэй харьцах, мэдээлэл солилцох албатайгаар зохион байгууллаа.

Тус газраас “2005 оныг өмч хөрөнгөд бүртгэлээр тавих хяналтыг сайжруулах жил” болгож зарлаж, улсын болон орон нутгийн төсвийн захиран зарцуулалтад хийж буй санхүүгийн хяналт шалгалтаар илэрсэн зөрчлийг барагдуулах, төсвийг зориулалтын бус зүйлд зарцуулах, шалгалтын мөрөөр тодорхой ажил зохион байгуулахыг даалгах, харьяалах дээд байгууллагад нь шалгалтын дүнгийн талаар мэдэгдэх зэргээр төсвийн хөрөнгийн зарцуулалтад тавих хяналтыг сайжруулах чиглэлээр ажиллаж байна.

4 дүгээр сарын байдлаар 2.29 тэрбум төгрөгийн төлбөр зөрчил илрүүлж, үүнээс 333.4 сая төгрөгийг төсөвт оруулахаар тогтоогоод байна. Эхний улиралд актаар тогтоосон төлбөрийн 4.06% буюу 89.1 сая төгрөгийг барагдуулаад байна.

Байгалийн голомтот халдварт өвчнийг эсэргүүцэн судлах төвийг эрүүл мэнд, санхүү, даатгал, нийгмийн хамгааллын чиглэлээр хамтран шалгалаа. Тус газрын санхүүгийн үйл ажиллагаанд 4.4 сая төгрөгийн төлбөр зөрчил илэрч акт тогтоосноос гадна эрүүл мэндийн чиглэлээр дараах зөрчлүүд илэрлээ. Уг төвийн лаборатори нь байрны багтаамж хүрэлцээгүйгээс биологийн аюулын II, III зэрэглэлийн лабораторийн түвшинд тавигдах халдварт хамгааллын дэглэмийн урсгал ажиллагаа хангагдаагүй байна. Мөн улсын халдвартын фондын байр нь шаардлага хангахгүйгээс үнэ бүхий эмнэлгийн тоног төхөөрөмж, багаж хэрэгсэл, химийн бодисыг хадгалахад тавигдах үндсэн шаардлага зөрчигдөж байна.

Ахуйн болон үйлдвэрлэлийн хог хаягдлын тухай хуулийн хэрэгжилтийг нийслэлийн төвийн 6 дүүргийн Үйлдвэрлэл, тохижилт үйлчилгээний хэлтэс болон Тохижилт үйлчилгээний компаниуд, мөн нийслэлийн хог хаягдлын төвлөрсөн цэгийг хариуцдаг Нөөц компаний үйл ажиллагааг шалгахад дүүрэг хороодын засаг дарга нар нутаг дэвсгэртээ хог хаягдлыг бууруулах, Ахуйн болон үйлдвэрлэлийн хог хаягдлын тухай хуулиар олгогдсон эрхээ хэрэгжүүлэх талаар тодорхой арга хэмжээ авч ажилладаггүй, хог хураамжийн орлогыг хог цуглуулах, тээвэрлэх үйл ажиллагаанд зарцуулдаггүй, тохижилт үйлчилгээний компаниуд хог хаягдал зайлуулах болон тохижуулах ажлыг зохих шаардлагын дагуу гүйцэтгэж чадахгүй байгаа зэрэг зөрчил дутагдал илэрснийг арилгуулах талаар нийслэл, дүүргийн засаг дарга, тохижилт үйлчилгээний компаниудад улсын байцаагчийн албан шаардлага хүргүүлж, биелэлтэд хяналт тавин ажиллаж байна.

ТӨРИЙН ӨМЧИЙН ХОРОО

Халдварт өвчин судлалын үндэсний төвийн ажилчдын 34 айлын орон сууцыг хувьчлах асуудлыг Засгийн газрын хуралдаанд оруулж шийдвэрлүүлэхээр болов.

“Дулааны II цахилгаан станц” төрийн өмчит хувьцаат компанийн нийт хувьцааг нэг багц болгон нээлттэй уралдаант шалгаруулалтын аргаар хувьчлан худалдах, худалдан авах гэрээний төслийг ТӨХ-ны хуралдаанаар хэлэлцэж батлав.

Монгол, Оросын хамтарсан “Эрдэнэт” үйлдвэр, “Монголросцветмет” нэгдлийн Зөвлөлийн хурал болж, “Эрдэнэт” үйлдвэрийн удирдлагын бүрэлдэхүүнийг Оросын талын саналыг харгалзан хэвээр үлдээхээр, “Монголросцветмет” нэгдлийн гүйцэтгэх захиралтай холбоотой асуудал шүүх, цагдаагийн байгууллагаар шийдэгдэх тул үүрэг гүйцэтгэгч томиллов.

“Багануур”, “Шивээ-Овоо”, “Булигаар”, “Говь”, “Монголэмимпекс”, Булганы “Эрдэнэт суврага”, “Дорнод автозам”, “Автоимпекс” ХК-иудын Хувь нийлүүлэгчдийн хуралд оролцох төрийн өмчийн төлөөлөгч томилон, итгэмжлэл удирдамж өгөв.

“Говь”, “МИАТ”, Булганы “Эрдэнэ суврага” ХК-иудын төлөөлөн удирдах зөвлөлийн бүрэлдэхүүнд өөрчлөлт оруулах асуудлыг төрийн өмчийн хорооны хуралд оруулж шийдвэрлүүлэв.

ШУДАРГА БУС ӨРСӨЛДӨӨНИЙГ ХЯНАН ЗОХИЦУУЛАХ ТАЛААР

Төрийн өмчийг 2005-2008 онд хувьчлах, өөрчлөн байгуулах үндсэн чиглэлтэй танилцаж зах зээлийн эрэлтэд нийцүүлэн үйл ажиллагааны төрлөөр багцлан гадаад, дотоодын хөрөнгө оруулагчдад нээлттэй уралдаант шалгаруулалтын аргаар хувьчлах үнэ цэнэтэй томоохон аж ахуйн нэгжүүдийн судалгааг хийв.

Аж ахуйн нэгжүүдийн давамгайл болон зүй ёсны монополь байдалтай, тэр байдлаа алдсаныг тогтоох журмыг боловсруулах, зах зээлд давамгайлсан, ноёрхсон, зүй ёсны монополь байдалтай аж ахуйн нэгжийн мэдээллийн санг бүрдүүлэх бэлтгэл ажлын хүрээнд эдийн засгийн бүх төрлийн үйл ажиллагааны салбарын ангилалаар зах зээлд зонхилох байдалтай аж ахуйн нэгжүүдийн судалгааг боловсруулав.

Төрийн болон орон нутгийн хөрөнгөөр худалдаан авах бараа ажил үйлчилгээний тухай хуульд гүйцэтгэх сонгон шалгаруулах журмуудыг судлан СЯ-ны Худалдан авах ажиллагааны бодлого зохицуулалтын газар Худалдан авах ажиллагааны хөгжлийн төвтэй уг асуудлаар санал солилцов.

ОЮУНЫ ӨМЧИЙН ГАЗАР

Шинэ бүтээлийн 19, бүтээгдэхүүний загварын 14, ашигтай загварын 20, барааны тэмдгийн 38 мэдүүлэг хүлээн авч бүртгэн, бүрдлийг хянав. Үүнээс шинэ бүтээлийн 24 мэдүүлэгт, бүтээгдэхүүний загварын 9 мэдүүлэгт эрхийн хамгаалалт хийх шийдвэр гарч, улсын бүртгэлд авсан байна. Ашигтай загварын 21 мэдүүлэгт, барааны тэмдгийн 52 мэдүүлэгт эрхийн хамгаалалт хийж, улсын бүртгэлд авсан байна. Мөн олон улсын барааны тэмдэг 122-ыг улсын бүртгэлд авав.

Нийт 31 шинэ бүтээл, 29 бүтээгдэхүүний загвар, 64 барааны тэмдэг, 31 ашигтай загварт патент болон гэрчилгээ олголоо.

“Оюуны өмчийг хамгаалах өдөр”-ийг тэмдэглэн өнгөрүүлэх сарын аяны төлөвлөгөөг боловсруулан батлуулж үйл ажиллагааг эхлээд байна.

“Оюуны өмчийг хамгаалах” өдөрт зориулсан хэвлэлийн бага зохион байгуулав.

Оюуны өмчийн газрын “Мэдээллийн төв”-ийн үйл ажиллагааг нээж, оюутан залуус болон иргэдэд мэдээллийг түргэн шуурхай хүргэх боломжийг нэмэгдүүлэв.

4-р сарын 26-ныг “Нээлттэй өдөр” болгон тэмдэглэж, үйлчилгээний хураамжийг иргэдэд хөнгөлж үйлчлэв.

ДОӨБ-ын хөгжлийн асуудлын талаарх хуралдаан болон хөгжлийн хамтын ажиллагааны байнгын хорооны хуралдаан, Швейцарь Улсын Женев хотноо зохион байгуулагдсан ДОӨБ-ын “Барааны тэмдэг, бүтээгдэхүүний загвар, газар зүйн заалт”-ын Байнгын хорооны 14 дахь удаагийн чуулганд оролцов.

УДИРДЛАГЫН АКАДЕМИ

Захиргааны зөвлөлийн хурлаар 2005-2006 оны хичээлийн жилийн элсэлтийн нэгдсэн комиссыг захирлын тушаалаар 7 хүний бүрэлдэхүүнтэйгээр байгуулан, 2005-2006 оны хичээлийн жилд элсүүлэх сонсогчдын хяналтын тоог баталж, хичээлийн жилийн докторантур, магистрантур, менежер, сертификатын сургалтын төлбөрийг тогтоов.

Энэ сард 9 удаагийн богино хугацааны сургалт зохион байгуулагдаж, 363 төрийн албан хаагч хамрагдав.

2005 оны 4 дүгээр сард Академийн эрдмийн зөвлөлийн хуралдаанаар эрдэм шинжилгээний ажлын төлөвлөлт, явц, үр дүнг хэлэлцэн зохих шийдвэрүүдийг гаргасан бөгөөд 2005 оны 4-р сарын 8-ны өдрийн хуралдаанаар “Төрийн үйлчилгээ, түүнийг

боловсронгуй болгох арга зам”, “Гүйцэтгэлийн удирдлагын хэрэгжилтийн байдал, хүрсэн үр дүнг тодорхойлох”, “Монгол Улсын засаг захиргаа, нутаг дэвсгэрийн хуваарьт өөрчлөлт оруулах асуудал”, “Төрийн албан хаагчийн мотиваци, түүнд нөлөөлөх хүчин зүйлсийн шинжилгээ”, “Төрийн албаны сургалтын хэрэгцээг тодорхойлох” сэдэвт судалгааны удирдамжуудыг хэлэлцэн баталж, судалгааны бэлтгэл болон хайгуулын ажлууд хийгдэж байна.

ТӨР ЗАСГИЙН ҮЙЛЧИЛГЭЭ, АЖ АХУЙГ ЭРХЛЭХ ГАЗАР

Энэ сард төр, засгийн төв байгууллагуудад 331.7 сая төгрөгийн санхүүжилт авч, санхүүгийн үйлчилгээ үзүүлж, аж ахуй, хангамж үйлчилгээний чиглэлээр 150 нэрийн 29.5 сая төгрөгийн бараа материал, тоног төхөөрөмж бэлтгэж нийлүүлэв.

Монгол Улсын Ерөнхийлөгчийн Индонез, Унгар Улс, Ерөнхий сайдын Малайз, Сингапур Улсад хийх айлчлалын төсвийг боловсруулан батлуулж, гадаад томилолт, аж ахуй үйлчилгээний бэлтгэлийг хангаж ажиллав.

Төрийн ордны зүүн жигүүрийн цэвэр, бохир усны сүлжээг бүхэлд нь сольж шинэчлэв. Мөн давхар бүрийн цайны өрөө, ариун цэврийн өрөөнүүдэд засвар тохижилт хийж, тоноглолуудыг шинээр суурилуулав.

Нийт 98.9 квм талбай бүхий 5 ажлын өрөө, зүүн талын 3, 4 дүгээр давхрын 330 квм талбай бүхий нийтийн эзэмшлийн коридорыг засварлав.

Дулаан цэвэр усны төв шугамд ус зөөлрүүлж, зэв арилгах төхөөрөмж шинээр суурилуулан тоноглов.

Австралийн Парламентын даргын айлчлал, төрийн ордонд явагдаж буй ёслол, хурал, зөвлөгөөн, семинар, уулзалт зэрэг 145 удаагийн арга хэмжээний аж ахуй үйлчилгээний бэлтгэлийг хангаж явуулав.

ЗАСГИЙН ГАЗРЫН ХЭРЭГ ЭРХЛЭХ ГАЗАР

----- о О о -----